

人物上總論

葛邑洵不乏人矣前有陳鍾勲伐焜燿數世其後或以功顯或以言傳至明季而節義凜凜一時士君子不與賊俱生而甘與城俱亡勒金石而不毀昭雲漢而常新者也惜乎前徽芳躅泯滅無存未免至今猶有盛衰之感幸

國家休養樂育數十年于茲矣葛民亦當鼓舞振興豈可使古人專美于前耶

長葛縣志 卷之五 終

長葛縣志卷之六

開封府許州長葛縣知縣何鼎纂修

人物志下

孝義

隱逸

耆壽

藝術

流寓

列女

令名垂于千載必其性情有異乎人者在也不然何以令人咏歌嗟嘆至于今不廢大抵門內雍容誠天倫之樂事一鄉向慕乃仁厚之休風此性情之不能自已者也若夫林泉寄興人瑞稱榮又或藝擅芳名

身安樂土何莫非性之獨全而情之感發者歟如葛
所傳孝義而下雖人有微顯世有遠近其流風餘韻
尚可想見且堅貞之操節烈之風見之閭閻中又其
性情之自然而不假勉強者安可不發此幽光于天
壤哉故類而序之仍次于人物志

孝義

徐元直辭昭烈曰旣失老母方寸亂矣請從此辭能
全母子之恩不失君臣之好此孝之盡而義亦見焉
矣元直葛人至今類多愷悌慷慨之士或經朝典旌

揚或因鄉黨興頌固足以光閭閻而昭簡冊者也於
戲元直之風遠矣

唐

王搏武會昌中侍母至廣行及沙浦口風起母溺死
搏武號泣赴水救之亦死嶺南節度使盧貞俾吏沉
罟訪獲二屍葬之表其墓曰孝子塚詔爲刻石

明

羅貴由舉人任山東蒙陰縣學教諭在任聞母劉氏
喪號慟幾絕卽舍妻子徒跣先歸及葬廬墓三年有

馴蛇鳴鵲之異有司上其事詔旌表其門曰孝行不
張壽由監生任南京鴻臚寺署丞以生母趙氏孀居
年老告歸終養朝夕不離母側母有病必親嘗湯藥
而後進雖垂老不倦也

韓檠本縣民父卒時方二歲稍長痛母苦節事之甚
謹每市物以供母或母未入口不敢先嘗母死塋墓
如禮子五人俱有雋才咸以爲孝義之報云

夏廷美本縣民事親最孝一父母病服藥不効廷美
割股以進病尋愈

羅山本縣民事母至孝母病朝夕不離卧側號泣籲天願以身代久之服藥無効親嘗母糞母病忽愈咸謂至孝所感年九十九卒子文光博野教諭孫萬善白水知縣遂成望族

王思孝本縣民父堂早卒母劉氏苦節自誓育五遺孤各底成立思孝痛母氏孀居之苦左右就養不遺餘力及劉氏以壽終思孝廬墓三年鄉人稱之

智國本縣民爲人慷慨謙謹事父母尤以孝聞且整理鄉約合邑子弟化之子明遠以文行著

韓天錫本縣民四世同居代有家法天錫孝行尤著
代巡觀風至邑首訪孝子邑令以天錫與智國舉焉
俱給粟帛以旌其行

吳世傑本邑生員資性穎悟年入泮每讀子游子
夏問孝章不能釋手事親能以色養朝夕不忍暫離
因父母年老懇告就養督學使廉知其行特允所告
深加歎賞仍許親終復學及親喪遵行古禮哀痛迫
切不出戶庭者三年邑人稱其純孝

車陽健字乾甫世至孝少時族叔叅議明理至鄉祭

祖其父憲設醴以待使徒往請明理托故不往徒曰

叔輕吾父謂吾不讀書耳吾不奮非孝也卽日往許

州從學時年已二十四矣自此激厲憤發晝誦夜習

不間寒暑越三年補邑弟子員尋食廩再應選貢年

僅四十二有志登科第不輕就仕嘉靖間改遷學校

於城東健有地數丈捐之以廣其基已而就狄道訓

導未幾母老告歸抵家僅餘俸三十金悉市甘旨以

供母侍養七年每食必親奉焉家貧蔬食布衣泊如

也邑舉鄉賓俱辭不赴鄉人薰其德而善長者甚衆

至今所居董村民無健訟者皆其化也子昭廩生恂
恂雅飭有父風

溫遇春本縣民幼年苦志讀書親老家貧苦耕奉養
供膳惟謹兼知法律本邑特取爲吏雖貧不以親故
受污辱之名士論多稱之

張實本邑民父思義自香河訓導歷轉卑節衛教授
凡四任俸餘令實與女弟三人均分實奉命不違更
能加愛諸妹及親有疾嘗藥以進祈禱脩至親卒哀
毀骨立守制三年人稱其生能順志死能盡哀張氏

可謂有子矣

韓發已字雲從性介特寡言笑好學不倦凡大義所關直任不避聯興元社毅然以扶直後學爲已任以麟經教授乙亥拔貢一時負笈從遊者皆成知名之士時人比之爲司馬德操尤工於書法求者屢滿戶外事孀慈脩極孝養母病親侍湯藥朝夕不懈及母卒晝夜悲號淚盡而繼之以血凡二十七日竟卒於母喪之側年僅四十有二雅負經濟才未遂厥志識者悼之

張朝定字紀竹號麒亭仁孝性成家貧力學祖母裴
憫其工苦異食食之定垂淚不敢嘗寒暑不輟隆冬
夜誦遍體如冰妻郭氏抱膝稍溫復讀如故及就鄉
試數列遺榜丙午以爭元不得復置遺元朝知數得
數失命不當第閉戶益深信從益衆窮理盡性之功
益邃值母喪年五十泣血身殞諸子皆登上庠有聞
于時

路乘殷字貞素國士子也篤實和易食餼上庠隨父
候選京師三年遇試期或勸之就試應曰身榮不如

親榮竟不歸父除灘佐尹隨之任九閩月父卒備極
艱辛數千里扶櫬歸至家卽塋或議其速殷曰時不
可知但早貽親安耳越三日流寇突至過其門號于
衆曰此孝子家也不可入有姊適李氏甫二年而寡
生子正發遭家難無依殷撫養教娶罔不周悉且誠
之曰女母十八誓守皆爲李氏一綫爾其無忘母志
兼慰爾外祖心也後正發果齠年入泮咸嘉其克全
婦節善體親心庚辰大饑昆姓有不舉火者殷曰誰
非祖父之遺萬一莫保我何以謝先人悉均所有胥

免于難立勸善會擇鄉之有德者月一會善則褒之
不善則匡之六子一侄皆自相授受其家不延外師
蓋已三世矣列上庠者三登賢書者一世業正未艾
也

國朝

胡作衡字明泉生員事父母以孝聞父先逝奉母惟
謹壽八十而終衡作孺子泣痛切終天殉母以亡鄉
人哀之以孝子勒石焉

歌再成邑生員崇禎八年流寇將至父視在鄉未葬

痛哭守之不忍去賊至境不入其門人以爲孝德所
感知縣李在公請於上以孝行旌之免其差徭

李應運字方旭起仲子由歲薦三任廣文少從父宦
游問寢視膳必誠必敬母病朝夕侍側湯藥必親嘗
方進不假僮婢家報至其妻病重置若罔聞及年逾
四十凡周旋膝下依依若童稚時事繼母亦以孝聞
弟應賓死難遺孤世篤當流離之際襁負不離迨脫
于難教養婚娶罔不周悉他若施金完婚置地掩骸
之類甚多子三人永篤淑篤禧篤有聲藝苑人以爲

孝友之報云

郭惠迪字禹謨太學生天性孝友七歲喪父痛母氏
孀居竭力奉事矢志攻苦十六歲游泮試輒冠軍每
以未登一第有負母教爲憾凡事必稟之於母凡物
必公之與弟當寇難流離未嘗稍違母意與弟同居
七十餘年友愛無間白首承顏老而彌篤逮患病猶
時強飯恐重母憂壽七十三先母氏卒鄉人有萊子
之稱以兄弟孝誼舉之有司旌其門曰孝友齊芳
郭惠疇字熙載幼承母訓苦志力學寇亂不顧妻子

隨兄負母而逃屢經播遷出入兵戈之中以誠孝所
感克保無恙與兄居鶴髮給背猶循循執弟子禮性
恬淡足不履城市者數十年有古君子風常以仰不
愧天俯不忤人二語教其子蓋因已之素行爲然壽
九十二無疾而卒人皆稱爲仁壽焉

程海龍字潛淵髫年有成孝友天性以醫術擅名辰
沅間時經喪亂念父母兄弟尚寄淺土道路梗塞每
呼天號泣遇鄉人則悲慟幾絕時寇難未靖不憚艱
辛時出機智歷險阻風波中携家歸里僕婢無失人

以爲誠孝所感卽竭力塋墓躬負土石并及伯叔昆
季復廬墓一年有叔母唐氏無子奉養喪墓如母撫
諸侄如子有子名曰鵬字雲客邑庠生夙有才名工
詩文翰墨父沒時尚幼家貧能繼父志從兄良弼良
允嫂朱氏俱年老無子鵬瞻養終身從嫂劉氏早寡
守志田產付鵬經理及兄子成立皆如數交還毫不
爲私族兄良明父子相繼死姑媳二孤鵬身任周卹
邑人皆稱父子孝友相繼云

王自貴葛西南鄉民族世單寒孝友出自天性明末

寇亂父子被執賊令父子同在軍者必殺貴諱之伺
隙曳父逃歸時地皆荒蕪又無耕具掘土播種以養
父母母先亡事繼母尤謹承顏順志安其母以悅其
父繼母生弟賢父亡時尚在襁褓事母撫弟倍篤于
初弟之教訓婚娶尤極周恤繼母臨終囑其弟曰爾
兄當尊禮事之勿視爲尋常兄弟厥後伯仲白首式
好家俱殷厚子孫繁昌

王慎字含之任內鄉教諭天性孝友誼行端方明庚
辰大疫患者多不得生時二親遭之貧不能延醫呼

天號泣祝以身代並愈繼值城陷賊令凡逃而復獲者死不赦慎不顧逃出尋見父母身竄荆棘體無完膚負之而遁外寇甫去土賊蜂起慮親老不能遠遷隱于幽僻處拮据奉養雖危難之時問視定省不少廢弛不出境者多爲賊害獨慎舉家獲全皆以爲純孝所感居喪哀毀抱病積年尤于親族備極周恤他如焚券施惠分囊贈友不能悉載其子風淳太學生孫五人皆業儒至今人猶仰之

張希堯字景唐資性英敏幼喪母賴祖母尚氏鞠育

家貧學業未成，父則明貿易于外，年久不歸。時年十五，奉祖母命，孤身尋父。遇寇被獲，泣告以情，言多愷切。寇亦感動，并竒其幼，而知孝，釋之。二載與父同歸。鄉黨義之。後年四十，無子，頗以爲憂。慰之者曰：天道不爽，仁人豈無後乎！果聯舉三子：廷璧、廷琇、廷珪，皆爲庠生。人咸以爲孝子之報云。

武際盛，字南羅，拔貢生。二歲而孤，性聰敏。母年十九，矢節，幼卽知孝。長奉母教，讀書日誦數千言，誓志顯揚，以慰母心。

國初就試蘇門首補弟子員戊子悞中副車人監屢試
第一太史黃漚涓器識之性尤仁愛亂後宗族播遷
皆招致歸家恤老撫幼各俾成立子贊孝友有父風
善書見藝術二孫亦恂恂閒雅

張惟忠字孝全業儒志未遂敦行孝友母氏先亡父
年八旬病疫不離左右衣不解帶者五十晝夜父故
卽遭大亂奉繼母段氏避難河朔當顛沛流離時定
省必勤愛敬益篤其從弟于陞幼孤愛若同胞于陞
婚娶人洋皆其教養功也且性耿介尚義完姻助葬

之類甚多負不能償者悉焚其券

以上孝行

元

任履真字子山有德行善文章與麻知基齊名嘗以
貲創學宮有墓并斷碑在縣東一里

李邦基鄉貢進士元泰定間

文廟毀於兵基地被傳千戶侵占告官給還仍損貲建
造見碑文

明

張英正統三年捐粟一千五百石賑濟貧民有司上

其事旌表其門

許高節字希夷少有大志能文章冲雅退讓有古君子風嘉靖初當貢期憫其表兄張魯年老讓之督學優獎已而連丁內外艱遲數年始得亦不悔也與伯兄清節同居兄有五子求異產遂以產業盡讓於兄其叔卒貧不能葬即賣產助之仍爲叔子婚娶妻弟宋惟馨六歲喪親卽爲撫養成立中壬子鄉試其好義周急多此類也初授海豐訓導遷靜寧州學正再遷王府教授巡使薦主宗學歷官二十餘年以禮致

仕歸進階儒林郎令有司時加優恤壽九十卒其子
嘉賓暨孫桂俱食廩邑庠而桂尤有文名人咸以爲
厚德之報

孫文四世同居凡百餘口文總理家政不事私產訓
子弟以禮子孫亦愛敬之有司特重其義屢舉鄉飲
其妻魏氏最有淑行文卒魏亦不食而死鄉人並賢
之

陳鉞散官佃僮有雅量輕財好施邑東置地二頃給
貧民耕種並不索賦鄉有貧不能舉喪者助財捐地

墓焉年九十步履若飛其子中美以廩例授光祿署
丞孫經畧以明經歷官教授俱好學善文壽皆八十
車瑄建德府儀賓教諭陽亨之子也遇歲旱荒鄉人
多饑捐粟一百二十石賑饑母死哀悼不已相繼而
亡鄉人咸誦其孝義

陳鎰道間偶拾遺銀七兩頃之有澤州客人牛召尋
之不得鎰驗實還之客分銀以酬復峻言卻之夏茶
冬粥濟人尤衆

呂璞輕財好施奉公守法輸稅糧輒先各戶施惠於

或無德色南門外創磚橋一座以利來往又施地掘井有碑記在焉遇荒減穀價以濟貧民

孫章侍孀母晨夕問安及母病步禱于武當山母病果愈建湏水石橋一座修觀音龍泉東嶽玉帝等廟給粟施棺周貧卹寡人皆稱孝義

邢國輔有里長符儉因醉遺金於道輔拾之儉歸家酒醒疑妻藏之妻欲赴井死輔知卽持金歸之夫妻愧謝鄉人義焉

崔山南門外昔爲湏水故道涉者病之山倡建石橋

一座以便行人今河道雖塞而石橋猶存

張廷珍張大會俱散官嘉靖間各捐三百金助遷

文廟兩院俱有旌獎額曰首倡義舉

張引捐住基以廣學今之射圃亭卽其地也又重修

戟門撫軍戴公給以崇儒重道之額已而故民王思

用妻徐氏亦以宅基捐入學宮婦人能此尤可嘉焉

王宣仗義重節守法奉公隆慶間學基改建宮室煥

然一新覺路猶湫隘宣乃捐住基以廓之門外更得

爽塏矣

洪克恭改建儒學艱於工費一時未就克恭捐財助
修費官煥然且施藥濟人賴以全活者甚衆

尹長壽天性仁愛慷慨好施歲大饑捐粟一千五百
石賑濟一時賴以全活者無筭當事聞之於朝立義
民坊以旌之恩賜二子入監讀書長子寬有父風亦
捐粟一千五百石亦建義民坊于西關

張綽捐貲建石橋三座在董村店有司表其義

張大約倡義修廟遂無河患又泐寒構立木橋以利
來往每歲率以爲常

長春縣志 卷之六
呂養化字海鯉氣骨山立任人不疑以服賈起家富
至巨萬弟侄衆多不私一錢不宿一諾析產時罄所
有均分焉又輸粟百餘石以賑貧生有貸而不償者
亦不介意真素封之義俠也

黃鍾號草溪英敏仁孝幼失怙恃以服賈起家事繼
母以孝聞友愛兩弟析居財產惟二弟所擇又施義
井義塚捐修學宮周孤寡助婚葬人咸德之例授儀
正數舉鄉飲賓壽八十有二子家賢靈臺主簿家才

清獻令孫朝直咸治士朝聘選朝經朝薦成進士爲

孝友盛德之報

孟存字默齋廩監生性謙謹和厚未嘗言人過失施
恩不望報有鬻妻者資給完聚其子良屏登丁卯賢
書人以爲積德所致

朱萬壽陳奇蘊俱長葛生員崇禎八年因流寇馳過
不屈而死知縣李在公以義士旌之

張守良字小田散官爲人好善樂義募修城隍廟及
立真觀煥然一新勒石時求不登已名常曰存心自
有天知行善何必人見貪天爲功有愧清夜繇是鄉

里小民薰其德而善良者衆邑令聞之延鄉飲賓者
九子三人範孔宗孔承孔臨終召三子於榻前命之
曰我死不願美棺槨豐祭墓但願爾等兄友弟恭勿
因一塊土而割百年愛卽爲孝子矣兩兄知父屬意
在弟曰唯命及葬凡房產婢僕美者盡推之弟弟遂
讓不遑兩兄遂遷于別居邑令汪公旌其門曰孝友
世家範孔博學善文辛巳死難承孔魁梧竒偉聰慧
過人乙酉恩貢妻邢氏苦節教子不墜家聲
楊瑤少以孝聞樂善好施祠廟橋梁修葺無筭歲饑

施永賑粥郡人賴以全活者甚衆事聞于上獎勵有加

李養才性好施賑邑人待以舉火者甚衆因歲饑賑粥人舉爲鄉飲賓上官以月旦雅望額其廬享年八十八

楊慎成邑庠生明季流寇紛擾捐金築石固砦一方賴以安堵

楊承傳邑庠生性義烈值城破遇賊奮擊殺之後賊衆至被害

崔煥字少文壬申以明經領歲薦一日正襟危坐而
逝家人驚呼久之俄然覺曰母畏肥鄉憑限在此促
我赴任矣少頃而絕聞者莫不爲異

孫煥錦字綱寰邑庠生守正不阿動有古人風以詩
書世其家教子義方長子麟種中壬子鄉試謹身循
理不殊寒素邑人賢之

左輔英爲邑文學順治初拾遺金二封於道英意當
兵荒之餘安得此物必其人急辦公事偶遺于此隨
詣縣遍詢有傳石相保八且李光字張聚吾失銀哭

往西去英復前覓之廉其數多寡悉合慨然還之
黃之鳳字九苞性廉介家徒四壁淡泊自適種花竹
樂詩酒有古隱者風邑紳從叔朝薦卒子光祚光裕
俱幼家事鳳身任之延師以課二弟及其成立悉以
產業歸之絲毫無欺兄之彥死亂子法憲尚在襁褓
保護不啻已子七十四卒

王祚增字益吾任九江府德化縣主簿賦性樂施濟
設立義學延名師里黨中子弟賴成就者頗衆明末
大饑施粟麥以贍貧乏邑人賴之適患危症父老百

餘人代爲祈禱尋愈壽七十八卒子二長朝興邑庠生孫五人有聞于時

胡加棟字雲樓府庠生重義好施周給族黨窮乏者不勝數葛邑兵燹之餘邑乘無存前令徐昇欲爲纂修奈文獻莫徵茫無措手棟知舊志所在道遠莫致捐二十金購之舊令陝西李在公家得之舊跡成規前言往行得不致泯滅者皆棟之力也

張仔觀字光生太學生有才行尤尚義樂施前令米漢雯遷建學宮苦無善地觀捐地基一區價值百金

換生員張勳居宅今尊經閣前至泮池蓋其地也且經營計畫脩極勤勞勳地價浮於觀衆方議補勳亦不受捐助修建一時共爲倡義之勸

李啓光兄弟三人素友愛析居後自置萬金業仍均分之弟不植生計田產售之他人光復贖歸以與弟施義田以贍養宗族改修濟衆橋不惜資費身任其勞詳邑令王茂材碑記

李毓桂字萼巖府庠生素行敦厚族黨貧乏者悉賴其周濟明季頻歲凶荒凍餒死者無數桂作粥賑饑